

Dr Mahathir tak setuju roboh "surau meditasi Buddha"
Malaysian Insider
Aug 18 , 2013
OLEH MD IZWAN

Bekas Perdana Menteri Tun Dr Mahathir Mohamad tidak bersetuju dengan keputusan merobohkan surau kontroversi di resort Tanjung Sutera Beach Resort yang digunakan penganut Buddha untuk beribadat di dalamnya.

Bagaimanapun, Dr Mahathir berkata tindakan merobohkan surau tersebut tidak boleh dihalang kerana penduduk setempat yang mendesak supaya ia dirobohkan.

"Tapi tentang merobohkan surau, tidak tahulah.

"Saya mempunyai pandangan berbeza, tapi mereka mahukan ia dirobohkan... jadi baiklah untuk pihak berkuasa laksanakannya," kata Dr Mahathir dalam sidang media di rumah terbukanya di The Mines City (gambar).

Apabila ditanya tentang keputusan kerajaan menarik semula status penduduk tetap (PR) semalam, Dr Mahathir bersetuju dengan langkah tersebut serta menegaskan kerajaan berhak untuk mengambil tindakan sedemikian.

"Kerajaan mempunyai hak untuk tarik status PR, jika sesuatu melanggar polisi negara... sesuatu konfrontasi agama adalah kita tidak alukan.

"Saya rasa tarik PR bukan tindakan keras," kata Dr Mahathir apabila ditanya tentang pengumuman oleh Menteri Dalam Negeri Datuk Seri Dr Ahmad Zahid Hamidi semalam.

Ahmad Zahid semalam berkata pemilik resort Tanjung Sutera Beach Resort Syed Ahmad Syed Salim Alkaff, 45, telah diberitahu tentang penarikan status PR semasa beliau ditahan reman selama empat hari baru-baru ini.

Pemilik resort tersebut kini disiasat mengikut Seksyen 295 Kanun Keseksaan iaitu mencemarkan tempat sembahyang dengan niat hendak mengaibkan agama mana-mana golongan.

Beliau boleh dikenakan hukuman penjara dua tahun atau denda atau kedua-duanya sekali jika disabit kesalahan.

Di samping itu, Sultan Johor Sultan Ibrahim juga telah mengarahkan surau tersebut dirobohkan sebaik siasatan selesai dijalankan.

Sebuah video yang dimuat naik di laman YouTube pada 10 Ogos lalu menunjukkan sekumpulan sami dalam sebuah bangunan kecil melakukan meditasi di hadapan potret Buddha.

Video sepanjang 63 saat itu bertajuk "Cina Buddha sembahyang di surau; surau jadi tokong" dimuat naik oleh "Sebastianphiu" dan ditonton lebih 10,000 kali.

Lokasi kawasan surau turut dinyatakan dalam video berkenaan iaitu di Sedili Besar, Kota Tinggi, Johor.

Pengurus resort itu mempertahankan keputusannya memberi kebenaran kepada penganut Buddha menggunakan surau.

Katanya, surau berkenaan hanya digunakan untuk bermeditasi dan tidak menganggap perkara itu sebagai satu kesalahan. - 18 Ogos, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/dr-mahathir-tak-setuju-robok-surau-meditasi-buddha>